

ZAKON O LIKVIDACIONOM POSTUPKU FBiH

Službene novine FBiH 29/03

Član 1.

Predmet Zakona

Ovim zakonom uređuje se likvidacioni postupak pred nadležnim sudovima u Federaciji Bosne i Hercegovine, u postupku likvidacije pravnih lica.

Član 2.

Svrha likvidacionog postupka

Likvidacioni postupak provodi se nad pravnim licima. On služi potpunom namirenju svih povjerilaca pravnog lica unovčenjem njegove imovine. Ukoliko nakon toga preostanu još neke imovinske vrijednosti, članovi pravnog lica namiruju se iz preostale imovine srazmjerno svom učešću.

Član 3.

Nadležni sud

Likvidacioni postupak provodi sud koji je, prema Zakonu o stečajnom postupku, nadležan za provođenje stečajnog postupka.

Član 4.

Razlozi za likvidaciju i pokretanje postupka

(1) Likvidacioni postupak provodi se u sljedećim slučajevima:

1. kada je pravnom licu rješenjem nadležnog državnog organa izrečena mjera trajne zabrane daljnjeg obavljanja djelatnosti pravnog lica. U ovom slučaju zastupnik nadležnog organa podnosi prijedlog za otvaranje likvidacionog postupka pred nadležnim sudom;

2. kada je pravosnažnim rješenjem suda utvrđena ništavost upisa u sudski registar ili ništavost osnivanja pravnog lica. U ovom slučaju sud koji je utvrdio ništavost prosjeđuje rješenje nadležnom likvidacionom sudu koji, po službenoj dužnosti, pokreće likvidacioni postupak;

3. u slučajevima u kojima se, prema Zakonu o privrednim društvima, mora provesti likvidacioni postupak. U ovom slučaju osnivač ovlašten za zastupanje ili organ ovlašten za zastupanje društva obavezan je podnijeti prijedlog za pokretanje likvidacionog postupka. Pri tome svaki pojedini osnivač za zastupanje ili svaki pojedini član organa ovlaštenog za zastupanje može podnijeti taj prijedlog. Osnivač ovlašten za zastupanje lica koja postupaju za organ ovlašten za zastupanje odgovaraju lično za svaku štetu koja trećim licima nastane zbog zakašnjelog podnošenja prijedloga;

(2) Odluka o provođenju likvidacionog postupka objavljuje se na oglasnoj tabli suda i u "Službenim novinama Federacije BiH".

Član 5.

Organi likvidacionog postupka

Organi likvidacionog postupka su: likvidacioni sudija i likvidator.

Član 6.

Postavljanje likvidatora

Za likvidatora, po pravilu, treba biti postavljen član dosadašnjeg organa za zastupanje pravnog lica. Sud može postaviti neko drugo pogodno lice za likvidatora ako postoje naznake za to da uredna likvidacija putem dosadašnjih članova organa za zastupanje ne bi bila osigurana.

Član 7.

Popis imovine, popis povjerilaca

(1) Likvidator je dužan likvidacionom sudiji predočiti popis imovine i obaveza pravnog lica. Popis se sastoji od svih imovinskih vrijednosti (popis imovine) i svih obaveza uključujući prava trećih lica na predmetima imovine i naznaku povjerilaca (popis povjerilaca).

(2) Ako za likvidatora nije postavljen član organa ovlaštenog za zastupanje pravnog lica, obaveze saradnje i davanja informacija odnose se na ove članove.

(3) Likvidator je dužan izjavom pred nadležnim sudom zajamčiti tačnost i potpunost podataka.

Član 8.

Prinudne mjere

(1) Ako je za likvidatora postavljen raniji član organa ovlaštenog za zastupanje pravnog lica, sud može odrediti prinudne mjere prema čl. 10. i 62. Zakona o stečajnom postupku ukoliko likvidator ne izvršava svoje obaveze prema čl. 7. st. 1. ovog zakona.

(2) Ako je postavljen likvidator koji nije član organa ovlaštenog za zastupanje pravnog lica sud može, na prijedlog likvidatora, odrediti prinudne mjere prema čl. 10. i 62. Zakona o stečajnom postupku ukoliko članovi ne izvršavaju svoje obaveze prema članu 7. st. 2. i 3. ovog zakona.

Član 9.

Unovčenje imovine, obaveza podnošenja prijedloga za otvaranje stečajnog postupka

(1) Likvidator je dužan bez odlaganja uzeti u posjed imovinu pravnog lica. On je ovlašten i obavezan na unovčavanje imovine pravnog lica. Prava trećih lica na predmetima i pravima imovine moraju se uzeti u obzir.

(2) Ukoliko su ispunjene pretpostavke za provođenje stečajnog postupka, likvidator je dužan u roku od 15 dana podnijeti prijedlog za otvaranje stečajnog postupka.

(3) Likvidator odgovara za sve štete koje povjeriocima ili članovima pravnog lica nastanu zbog zakašnjelog podnošenja prijedloga.

Član 10.

Troškovi suda i uprave

(1) Iz imovine pravnog lica likvidator je, kao prvo, dužan unaprijed izmiriti troškove i takse suda, takse i izdatke svoje uprave i nastale nužne troškove uprave.

(2) Takse uprave određuju se na osnovu propisa donesenog u skladu sa članom 237. Zakona o stečajnom postupku.

Član 11.

Dioba

(1) Likvidator namiruje potraživanja povjerilaca srazmjerno visini njihovih udjela u potraživanjima čim budu na raspolaganju dovoljna sredstva za raspodjelu.

(2) Ukoliko su potraživanja povjerilaca za koja ne postoji izvršni naslov sporna, likvidator tim povjeriocima određuje rok od 15 dana. Ako povjerilac u ovom roku dokaže podizanje tužbe, likvidator prilikom diobe zadržava iznos koji otpada na tu obavezu.

(3) Ukoliko povjerilac u ostavljenom roku ne izvrši obavezu iz stava 2. ovog člana potraživanje povjerioca prilikom diobe ne uzima se u obzir.

Član 12.

Odgovornost likvidatora za unovčenje i diobu

Likvidator lično odgovara za skrivljenu povredu svoje obaveze da imovinu unovči što je najbolje moguće i da prikupljeni iznos ravnomjerno podijeli.

Član 13.

Obaveze podnošenja izvještaja i polaganja računa

Likvidator je dužan na traženje suda, ali najkasnije sa okončanjem postupka diobe, položiti račun o svojim radnjama i sudu predati pisane potvrde na provjeru.

Član 14.

Okončanje postupka

Nakon dokaza o potpunoj diobi imovine sud razrješava likvidatora njegove službe i zaključuje postupak. Zaključenje postupka se javno oglašava u "Službenim novinama Federacije BiH".

Član 15.

Gašenje pravnog lica

Nakon što je zaključenje likvidacionog postupka postalo pravosnažno, sud određuje brisanje pravnog lica u svim javnim registrima.

Član 16.

Primjena drugih propisa

Danom stupanja na snagu ovog zakona prestaju da važe odredbe o likvidacionom postupku iz Zakona o privrednim društvima ("Službene novine Federacije BiH", broj 23/99) koje su u suprotnosti s ovim zakonom.

Član 17.

Stupanje na snagu

Ovaj zakon stupa na snagu narednog dana od dana objavljivanja u "Službenim novinama Federacije BiH".